

宋元學案

古靈四先生學案表

陳襄

孫覺

別見安定學案

安定同調

吳道

張公諤

章衡

傅楫

從子
希龍

陳貽範

管師復

管師常

林石

沈躬行

別見周許諸儒學案

陳砥

呂逢時

錢景臻

黃穎

子公坦

劉淮夫

鄭穆

陳烈

周希孟

劉康夫

潘鯁

曾伉

劉彝

別見安定學案

並古靈講友

章望之

吳師仁

並見士劉諸儒學案

司馬光

別爲涑水學案

張載

別爲橫渠學案

並古靈同調

劉夔

曹穎叔

蔡襄

並公闢學侶

宋元學案卷五

鄞縣全祖望補本

後學慈谿馮雲濠校刊

鄞縣王梓材重校

道州何紹基重刊

古靈四先生學案

祖望謹案安定泰山並起之時閩中四先生亦講學海上
其所得雖未能底于粹深然而畧見大體矣是固安定泰
山之流亞也宋人溯導源之功獨不及四先生似有闕焉

或曰陳烈亦嘗師安定未知所據述古靈四先生學案

梓材案古靈學案謝山所特立謂之述者謙辭也黃氏補本仍
屬之梨洲非是又案其表以古靈爲安定門人亦無據

安定同調

忠文陳古靈先生襄

陳襄字述古侯官人也學者稱爲古靈先生是時學者方溺于
雕篆之文相高以詞華所謂知天盡性之說皆指以爲迂闊而
士亦莫之講也先生獨有志于傳道與其同里陳烈鄭穆周希
孟者爲友氣古行高以天下之重爲己任聞者始皆笑之先生
不爲動躬行益篤學者亦稍稍化之多從之遊而閩海閒遂有
四先生之目雖有誕突恣傲不可率者不敢失禮于其門已而
四先生之名聞于天下有從遠方來受學者以進士爲浦城簿
縣闕令先生行令事斷獄明決人莫能干以私首興學宮爲諸
生講學從之者五百餘人而章衡卒爲名臣部使者安積至其
縣先生以十事陳之安是之皆爲施行以遷爲仙居令仙居山

縣莫知學先生之興學宮課諸生如浦城有問難者得乘先生聽訟之暇入問于庭偶出行部遇山谷中有小學輒下車爲童子輩講經從學者漸多而管師復兄弟卒爲名儒遷著作佐郎知河陽縣仙居之民攀車遮道幾不得出境時富鄭公帥河陽一見厚禮之先生之興學宮課諸生如仙居或謗之富公曰是賺子弟輩束脩耳富公以告先生曰自反而縮何嫌人言或勸先生罷講答曰以讒人使諸生遂不得聞道吾恥之講益力富公久而益奇之入相薦爲太常博士召試祕閣校理尋判祠部譯經僧法護遺奏乞度十僧趙槩亦請列于廟中三年度一道士先生堅執不行且請禁宮闈要近之妄有陳乞者坐是解祠部編昭文館書籍已而以祠部員外郎知常州復興學宮課諸

生如河陽時承安定先生湖學之後東南講席稍衰先生復振之以顧臨司之每晨親往與諸生講經義芻決吏事于是毗陵之盛擬于湖學常州運渠橫遏震澤積水不得北入于江爲吳下民田之害先生以渠之丈尺對民田之步畝分授以浚深廣有制不月而成遂削望亭古堰而震澤積水乃克北流田患以除遷司封員外郎爲開封府推官將行得公帑雜收無名錢數百萬因以償積年官逋之未清者入爲三司判官使遼尋修起居注知諫院管勾國子監等先生薦可爲太學師長者四人小程子其一也尋罷諫院兼侍御史知雜事故事左右史以次知制誥而臺雜乃遷三司副使于是有旨候知制誥闕召試先生辭曰陛下以義使臣敢不惟命是聽豈敢計較資地以爲輕重

况知雜之任上裨朝政下肅臺綱豈願寵祿之居後哉若有願避之心身且不正焉能正人乃許追寢前命于是王荆公執政行新法先生力言青苗不便五奏皆不報其進第四狀曰臣觀制置奏請莫非引經以爲言而其實貸民以取利是特爲管仲商君之術臣願陛下爲堯舜之君以仁義治天下不願陛下爲霸主也陛下富有中國廣輪萬里內無強臣敵國之患外無西戎北狄之難四海九州之賦供用不爲不足不于此時與廟堂之臣坐而論道以行王政而反屑屑爲均輸舉貸之事臣竊惜之其第五狀曰誤陛下者王安石也誤安石者呂惠卿也安石持強辯以熒惑于前惠卿畫詭謀以陰助于後故雖陛下之至聖不能無惑近者中丞呂公著而下皆以不職乞從責降臣獨

區區未敢請者尙冀犬馬之誠一悟聖意許以青苗之法下百官集議如臣等言非甘從遠竄如是則安石惠卿乞行貶斥以謝天下又言劉述劉琦錢顛等皆以言事責降范純仁以此待罪朝廷上下之情乖戾若此臣甚憂之乞免其罪以大有容之德又乞召還范純仁以厭人望又言中丞呂公著以造膝之言落職補郡安石增改誥詞暴揚其語欲以中傷尤失事體右正言李常待罪兩月不報必非陛下之意又言韓絳以制置三司條例司而爲參政是以利進自古進用大臣所未有又言李南公李定不可用王子韶爲小人于是神宗有詔召先生試知制誥而所奏皆留中不下先生辭曰臣所言不能開悟聖心方且待不職之罪未知譴所召試非臣所敢當荆公方遣人趣先生

承命見奏大恨議出爲陝西轉運使上曰陳襄經術宜在講筵
乃復令修起居注直舍人院兼天章閣侍講先生固辭神宗賜
手詔曰卿以言事未遂不受知制誥之命且求外補朕慕卿經
術深惜遠去特還舊職庶幾左右經席漸摩道義來奏尙欲固
辭豈未悉朕意與還卿來章當亟就職先生不敢復辭次年卒
用爲知制誥荆公終欲出之上不許詔直學士院荆公惡之不
已以草河北詔言水不潤下中書改之又赦文有奉祠紫宮之
語爲犯俗先生乞出遂知陳州未幾移杭州先生以杭之學校
不興復修築聚講如常州且修六井水利已而復知陳州其講
學如杭州熙寧八年召還知銀臺遷樞密直學士判太常次年
兼侍講又次年命爲郊祀禮儀使詳定郊廟禮樂元豐二年判

尚書都省神宗且有意大用之而先生病矣次年卒妻子問道言索筆書先聖先師四字贈給事中其後累贈少師諡忠文所

著書有易義中庸義古靈集二十五卷

雲濂案先生所著書尚有州縣提綱其古靈集

二十五卷爲先生子紹夫所編居易錄稱爲二十卷蓋未見完帙也

先生一言一行皆以古人爲

法喜怒不形于色荆公之退也先生在講筵薦司馬溫公以下三十三人神宗善之而不能盡用也元祐名臣皆在其中南渡後高宗得其橐詔示天下以爲薦士者法

祖望謹案宋仁之世安定先生起于南泰山先生起于北天下之士從者如雲而正學自此造端矣閩海古靈先生于安定蓋稍後其孜孜講道則與之相埒安定之門先後至一千七百餘弟子泰山弗逮也而古靈亦過千人安定

之門如孫莘老管臥雲輩皆兼師古靈者也于時濂溪已起于南涑水橫渠康節明道兄弟亦起于北直登聖人之堂古靈所得雖遜之然其倡道之功則固安定泰山之亞較之程張爲前茅焉故特爲立一學案而以鄭氏陳氏周氏三子並見于後

古靈先生文集

隱居求志古人尚之然有聖人之隱有賢人之隱有介夫之隱聖人之隱樂天以俟命時未可而潛時可而躍者蜿蜿蜒蜒莫知其神舜伊尹是也賢人之隱養氣以畜德庸言庸行居貧賤而樂顏會是也介夫之隱但潔其身而不累乎世足以自牧而不足與憂天下長沮桀溺是也是則君子不爲也

與章表民

復進士來茲者亦早夜不已有所勉然進而是退而疑故吾日
爲之憂恐不能有遠到者

與陳成

好善之人惟恐有所不聞好爲善之人惟恐有聞

答黃殿丞

不離經而用權不先利而後義

視非正色謂之不明聽非正言謂之不聰故君子不以耳目近
小人不以小人亂視聽也

以上與安度支

聖人之經待人而傳當明大義折諸家異同之說以示後學不

宜有讓

答許太博

僕他無一二至于古人至于好人之善樂聞己之過則似有之

答周有終

君子患己不立不患不能文德至斯言至矣

與元屯田

常患近世之士溺于章句之學而不知先王禮義之大上自王
公下逮士人其取人也莫不以善詞章者爲能守經行者爲迂
闊天下之士習固已塗贖其耳目而莫之能正矣某自蒞事以
來以興學養士爲先務以明經篤行爲首選將以待夫有志之
士彼四方之學者輕千里而外其亦有望于茲德薄任重不足
以獨當其責思得先生共教以德行道藝之事

與顧臨

凡人生而與萬物俱生長而與萬物俱化終身與萬物浮沈以
是而求至于聖人難哉孔子語顏淵曰非禮勿視非禮勿聽非
禮勿言非禮勿動然後天下歸仁

今有裸衣而倒行者目之者曰此狂惑喪心之人至于學者喪
其本心不惟不自知亦無目而指之者豈不宜大自驚懼持循

而修省哉

以上答徐洪

去聖日遠，明周楊墨之說，衣被天下，故後之習孔子者多聞見，則易慎擇之，則難自韓退之來，六百年有餘矣。季甫比曰：子吾儒爲有功，足下慎折衷之。

答周公闕

君子之所貴乎身者道焉而已，不苟利不苟進不苟得，惟義而止。

答元屯田

行與止係乎天，進與退存乎己。

與富相公

古人事死如生，葬則欲其返，虞則欲其安，耐則欲其存而不忘，哭之有倚廬，事之有祖廟，廬于墓非古也。

答劉太博

古之聖賢存其心，視天下之民如其子，一夫不獲則不能安乎其身，曰天假手于我，以養之，吾何忍弗顧也。故禹稷三過其門。

而不入伊尹五就桀太公七十歸周孔子皇皇諸侯之國彼豈不知養心治氣安佚之樂一畝之宅可以終身訢然而忘天下哉今之仕者與之祿則受之至于民有死亡危苦則聽之又惡知畏天命而愍人窮也比見欽之于河陽其議論誠佳矣然而未知其仁今將有民社以爲政吾于是觀焉欽之勉之

與傅祭

推序

行身乎大方之塗養心于至義之源游泳乎詩書之和沈潛乎易春秋之微博之以文藝約之以禮法而歸之于誠亦庶乎其至也

送管師常序

好學以盡心誠心以盡物推物以盡理明理以盡性和性以盡

神

送章衡序

祖望謹案古靈崛起南嶠昌明正學雖其立言尙有未盡
融洽者如此五語是也然其大意已通關洛之津較之石
徂徠輩則入細矣

無近名無躐學無急于奔競

送章衡序

君子之道正以持之通以行之正者道之經通者道之權二者
相用而成孰爲正曰中庸是也孰爲通曰隨時之義是也仁以
居之義以出之正在其中矣智以遷之禮以和之通在其中矣
君子知是四者所以藏身也庸言之信庸行之謹雞鳴而起孳
孳守之而弗失其善持之也是謂之正萬物相感而情僞生萬
物相交而利害生故其道有否泰時有險易而濟之以屈伸語
默之變是謂之通

何秉字序

誠至于高明博厚而不息也然後能定明至于廣大精微而不
惑也然後能應

聰明不足以自任權勢不足以自私

以上上殿劄子

聖人先得乎誠誠則明矣賢人思誠者也因明而後誠存其所
謂正而公者去其所謂邪而私者此之謂擇善戒慎于不睹不
聞之際此之謂慎獨而固執之此之謂明則誠矣

誠明說

子愍汝邑民不識爲學父子兄弟不相孝友鄉黨鄰里不相存
恤其心惟汲汲爭財競利爲事以至身冒刑憲鞭箠流血而不
知止柰奉天子教條不可私恕每刑一人若傷膚髮而汝輩不
知于心乃相煽熾構訟成獄自以爲能使予日不得食夜不得
寢是誠何心然非汝百姓之樂于此也蓋不知讀書之故也十

室之邑必有忠信汝父老歸告子弟令來學子將擇明師而教
諭之

仙居勸學文

爲吾民者父義毋慈兄友弟恭子孝夫婦有恩男女有別子弟
有學鄉里有禮貧窮患難親戚相救婚姻死喪鄰保相助無惰
農桑無作盜賊無學賭博無好爭訟無以惡凌善無以富吞貧
行者讓路耕者讓畔頽白者不負戴于道路則爲禮義之俗矣

仙居勸俗文

學校之設非以教人爲詞章取利祿而已當致學者首明周官
三物之要使有以自得于心而形于事業然後可以言仕

杭州

勸學文

古靈語

人不可爲人所容

見晁氏客語

格君心之非吾徒事也

世之欲堯舜其君者莫若求大賢而進之

以上見劉執中所作

祠堂記

祖望謹案王偁作陳古靈傳詆其迂闊心竊異之謂偁不應乖謬至此及讀程俱北山小集乃知此語本于紹聖實錄而偁不審而實之者也北山有曰襄所薦三十餘人其所學皆不以當時之所建立爲然者襄之行己從可知矣

北山又曰襄之美以壬午之詔而益明

梓材案壬午當作壬子

熙寧經筵論薦三十三人品目

端明殿學士右諫議大夫集賢院修撰提舉西京嵩山崇福宮

司馬光素有行實忠亮正直以道自任博通書史之學可備顧問

端明殿學士翰林侍讀學士吏部郎中知許州韓維器質方重學亦醇正知盡心性理之說得道于內可以應務于外

翰林侍讀學士寶文閣學士戶部侍郎提舉崇福宮呂公著道德醇明學有原本事君以進賢汲善爲己任

以上三人皆股肱

心膂之臣不當久外

祕書監集賢院學士知杭州蘇頌長于史學國朝典故多所稌達可充編撰之任

右司諫直集賢院孫覺明經術義理之學端良信厚可以鎮浮厲世

祠部員外郎祕閣校理知齊州李常性行醇正兼治經術可比于覺

兵部員外郎直集賢院知和州范純仁器識通明忠義骨鯁足濟大事

以上三人可充侍從

祠部員外郎直史館權知河中府蘇軾豪俊端方雖不長于經術然百氏無所不覽文詞美麗尤通政事

祠部員外郎集賢校理權知洪州曾鞏文詞典雅與軾各爲一

體二人可備文翰

祠部員外郎集賢校理同修起居注孫洙博學能文所守亦端兼明世務可充史臣

祕書丞集賢校理王存學行素著方重有守不爲勢利所遷

太子中允判武學顧臨才豪氣剛兼有識畧喜于聞過可屬以危難之事

著作佐郎集賢校理林希少有文行

祖望謹案三十三人中惟斯人晚節不終

右司郎中分司南京李師中人多稱其有才可當邊帥

兵部員外郎傅堯俞以義去就有古諍臣風

太常博士河東提刑胡宗愈文醇行循兼明經術

以上三人以

言事未蒙宥復

前著作佐郎王安國材器磊落罪廢不忘進學

太子中允應天簽判劉摯性行端醇詞學淵遠

太常博士宗正丞虞太熙治經有行不苟于進可充臺閣

太子中允監西京洛河竹木務程顥性行端醇明于義理可備風憲

太子中允權發遣淮南西路運判劉載少治經術兼有文行可備臺閣

殿中丞充秦鳳熙河路句當官薛昌朝才質俱美持守端直可置臺閣

著作佐郎崇文校書張載養心事道不苟仕進西方學者一人而已

興國軍掌書記蘇轍學與文若不逮軾而靜厚過之

前台州司戶今召試館閣孔文仲性行淳粹文章正直

歙州推官吳賁以孝行聞治經學尤盡心于民政

前延陵令吳恕器識醇深學通義理

屯田郎中知太康縣林英和而不隨直而不撓

都官員外郎監泗州倉孫奕士行著于鄉閭節義信于朋友所
至以善政聞可當一路

著作佐郎監揚州糧料院林旦通曉民政兼有持守

太常博士監衡州鹽倉鄒何操履端方吏才通敏

大理評事唐垌性雖輕脫才幹明敏以言事實今監杭州龍山
稅流落遠方

前監安上門英州安置勒倅鄭俠愚直敢言發于忠義望陛下
矜憐使得生還

祖望謹案古靈先生講學以誠明爲主其立朝尤以薦賢

爲急今觀其三十三人品目自溫公申公韓范劉王諸大臣無不當其性行其謂橫渠則曰西方學者一人而已于東坡則曰不長經術卽此可見先生之學之醇故備錄之其生平薦士于當路尙多今皆附載于後

與陳安撫薦士書

九人

殿中丞致仕胡瑗博學通經負文武之道而適用不迂雖老尙可大用

舒州通判王安石才性賢明篤于古學

穎州司法劉彝其政與學通達體要

合肥主簿孫覺才質老成經學浸有原本文辭簡粹

揚州孫處高介好古而志道安貧不仕文辭必臻于理

衢州江山縣周穎剛義孝友不畏強禦

越州蕭山縣吳孜勇于爲義少習聲律之學旣而約心于理甘

貧養親

其二人卽陳烈鄭穆

祖望謹案其與韓丞相薦士書

十七人

曰知綿州龍安縣劉

載虔州推官吳賁前澧陽令監秦州如皋縣鹽倉盛僑松

陽令余京上虞令丁騰江寧府監上元縣管師常長垣主

簿孫路

以上皆文行經術之士

沂州防禦推官宋希元葉縣尉吳道

鄆州觀察推官許安世監池州酒務楊國寶前涇州觀察

推官王巖叟明州鄞縣尉陳頤

以上皆強志力行之士

左軍巡院判

官黃顯節度推官曾華旦大理寺丞黃默松溪令賈易

以上

皆幹能之士

其與蔡舍人薦士書

八人

曰太學直講胡瑗進士吳

致管師常任原倪天隱張京明經顧臨又友人陳烈此皆古靈未甚達時所薦及修起居注則薦常秩爲侍御史則薦陳烈領國子監事則薦常秩陳烈程頤管師常知杭州則薦吳師仁爲樞密直學士又薦陳烈其試士則薦陸佃而其薦三十三人最在後能留心天下之人材未有過于先生者也其中多講學儒者自胡公二程張子外盛僑吳致劉彝顧臨周穎倪天隱皆安定弟子楊國寶賈易皆伊川弟子而孫覺管師常則先生之徒而卒業于安定者惟常秩林希有負先生之舉耳先生又嘗以祖徠忠義經術乞官其子

梓材謹棠先生所薦又有禮祠客磨四部主簿黃庭奩見黃豫章外集

古靈講友

祭酒鄭閣中先生穆

鄭穆字閣中侯官人也四先生之一醇謹好學讀書至忘蘄沐進退容止必以禮門人千數以進士爲壽安簿召爲國子監直講尋編集賢館書籍積官太常博士以集賢校理通判汾州熙寧三年召爲岐王侍講又爲嘉王侍講神宗謂古靈曰如鄭穆德行乃堪左右王者耳凡居館閣三十年而在王邸一紀非公事不及執政之門講經至可爲勸戒者必反復摘誦二王咸敬禮焉元豐三年以朝散大夫知越州先是鑑湖旱乾民因田其中延表百里官籍而脫之旣而連年水溢民逋官租且萬緡先生悉奏免之未滿乞休管句杭州洞霄宮元祐初召拜國子祭

酒每坐講席無閒寒暑雖童子必朝服延接以禮送迎學者尊其德而服其教故人張景晟者死遺白金五百兩託其孤先生曰恤孤吾事也金于何有反金而育其子三年揚王荆王並請爲講官解祭酒以直集賢院充荆王府侍講荆王薨復爲揚王府翊善太學諸生請之有詔仍任祭酒兼充徐王府翊善四年拜給事中兼祭酒次年遷寶文閣待制兼官如故明年乞休詔以提舉洞霄宮致仕太學諸生數千人以狀白宰相乞留范給事淳夫言穆雖年逾七十精力尙強古者大夫七十致仕有不
得謝則賜之几杖祭酒居師資之地正宜老成願毋輕聽其去因引唐韓愈留孔戣故事不報于是公卿大夫各爲詩贈行空學出祖汴東門之外都人觀者如堵淳夫詩曰顧我言非韓吏

部多公節似孔尙書明年卒先生著述不傳古靈謂其深造于道心仁氣正勇于爲義文博而壯淳夫亦曰閩中眞長者元祐之盛羣賢咸在朝居祭酒者前推先生後推顏復皆眞儒云

直講陳季甫先生烈

陳烈字季慈侯官人也學者稱爲季甫先生天性介特篤于孝友年十四繼喪父母水漿不入口者五日自壯迨老享奉如生事禮寢興晦朔未嘗止一日夢中褻經哭其親于中庭哀聲震戶外家人聞之而先生未寤也嘗語古靈曰烈今日縱得尊榮父母不之見何足爲樂其無意于世矣力學不羣平日端嚴終日不言雖御童僕如對大賓里有冠昏喪祭請而後行從學者數百父兄訓厥子弟者必舉其言行以規之慶曆初應試不中

選遂不復赴禮部或勉之仕則曰伊尹守道成湯三聘以幣呂望持誠文王載之與歸今天子仁聖好賢有湯文之心豈無有先覺如伊呂者仁宗以大臣之薦累詔之不起或問其故曰吾學未成也自是交章論舉先生志不少易古靈每謂人曰世多以季甫爲潔身不仕之流非也蓋其志孔孟之道不肯苟進而己嘉祐中詔授本州教授不拜而福建提刑王陶奏先生以妻林氏疾病醜瘦遣歸其家十年不視烈貪詐人也已行之命乞賜削奪司馬溫公在諫院上言臣素不識烈不知其人果如何惟見國家常患士人不修名檢故舉烈以獎厲風俗若烈平生操守出于誠實雖有迂闊之行不合中道猶爲守節之士亦當保而全之願委公正官吏通儒術識大體者覆實若止于夫婦

不相安諧則使之離絕而漸洗其過庶復申眉于後若復敗亂名教則嚴賜刑誅并治舉者之罪以明至公于是陶奏不行明年歐陽公復薦其行除國子直講竟不出久之詔許從其志以宣德郎致仕先是古靈在臺中舉先生自代稱其道已造大賢之域然先生行過拘故終多以矯僞疑之者皆王陶之流也元祐初復詔爲本州教授不受祿敝衣糲食處之裕如稍有餘卽以周貧乏者七十六歲而卒

附錄

或問陳烈行古禮率子弟匍匐以弔蔡君謨爲世俗譏笑太不近人情張橫浦曰今取鄉黨言閭閻侃侃踧踖與與色勃足踴豈不爲怪狀但世俗以人視人故耳

梓材謹案此條梨洲所節橫浦心傳本在橫浦學案今以
言陳季甫事移錄于此

助教周公闢先生希孟

周希孟字公闢侯官人也四先生者古靈最有名閩中亦顯于
朝而先生與季甫獨不出然交相重也遍通五經尤達于易弟
子七百餘人知州劉夔曹穎叔蔡襄皆親至學舍質問經義部
使者相繼薦于朝詔賜粟帛授將仕郎試國子監四門助教充
本州學教授三表力辭不許尤闢佛氏之說卒門人曾伉等祠
其遺像于五福寺中所著有易義詩義春秋義今皆不傳案古
靈先生引先生說大有之九四謂前儒以彭爲芻之非彭盛也
九四體是離明能知九三之專不從其盛專心以奉六五也以
彭爲盛蓋自先生發之

知州劉先生彝

別見安定學案

古靈同調

光祿章先生望之

宮教吳先生師仁

並見士劉諸儒學案

文正司馬涑水先生光

別爲涑水學案

獻公張橫渠先生載

別爲橫渠學案

公闢學侶

侍郎劉先生夔

劉夔字道元崇安人第進士歷知陝廣潭州所至有廉名累官

樞密直學士知鄆州發廩賑饑民賴全活盜賊屏息後知建州

以戶部侍郎致仕

參姓譜

雲濠謹案先生所著有春秋衰貶志五卷見鄭氏通志

龍圖曹先生穎叔

曹穎叔字力之亳州譙人進士及第累官右司郎中陝西都轉運使自慶曆鑄大錢行陝西民盜鑄不已先生請罷鑄諸郡鐵錢以三鐵錢當銅錢之一從之進龍圖閣學士知元興軍卒于官

參史傳

忠惠蔡先生襄

蔡襄字君謨仙遊人舉進士爲西京留守推官館閣校勘范文正仲淹以言事去國余忠襄靖論救之尹師魯請與同貶歐陽文忠移書高司諫若訥三人皆坐遣先生作四賢一不肖詩都人爭相傳寫契丹使買以歸張于幽州館後仁宗更用輔相親

擢忠襄文忠及王懿敏素爲諫官先生又以詩賀三人列薦之
帝亦命之知諫院進直史館兼修起居注益任職論事無所回
撓歷知開封府以樞密直學士再知福州郡士周公闢陳季甫
陳述古鄭闕中以行義著先生備禮招延誨諸生以經學召爲
翰林三司使旋乞爲杭拜端明殿學士以往卒年五十六贈吏
部侍郎先生工于書爲當時第一仁宗尤愛之乾道中賜諡忠
惠同上

梓材謹案歐陽公爲先生墓誌云徙知福州復知泉州往
時閩人多好學而專用賦以應科舉公得先生周希孟以
經術傳授學者常至數百人公爲親至學舍執經講問爲
諸生率延見處士陳烈尊以師禮而陳襄鄭穆方以德行
著稱鄉里公皆折節下之較史傳更爲分明

古靈門人

學士孫莘老先生覺

別見安定學案

縣尉吳先生道

吳道字眞常浦城人也學于古靈從之至河陽古靈嘉其志節謂能修身治性不爲事物之惑使爲河陽學舍都講遂遊太學以進士爲葉縣尉古靈嘗薦之韓忠獻公謂能知無不爲剛直不撓可任以難事

張先生公諤

張公諤者閩縣人也其在古靈門下見知與吳道等河陽都講其一爲公諤而道副之

待制章先生衡

章衡字子平浦城人登進士第一歷鹽鐵判官同修起居注出

知汝州潁州還判太常寺出知鄭州奏罷原武監弛牧地四千二百頃以予民復判太常知審官西院使遼燕射連發破的遼以爲文武兼備待之異他使歸纂歷代帝系名曰編年通載神宗覽而善之賜三品服判吏部流內銓未幾擢知通州進銀臺司直舍人院拜寶文閣待制元祐中加集賢學士

從黃氏補本

錄入

祖望謹案古靈劾李定未行定擢中允三舍人不行而章子平行之見元城語錄

附錄

元城語錄曰王安石薦李定時陳襄彈之未行已擢監察御史襄行宋次道封還詞頭辭職罷之次直李大臨再封還最後付

蘇子容又封還之更奏復下至于七八俱落職奉朝請名舉赫
然此乃祖宗德澤百餘年聞養成風俗共與齊太史見殺三人
而執爾如初者何異再後攝官修起居注章衡行之賢不肯于
此可見

龍圖傅先生楫

傅楫字元通仙遊人少自刻厲從孫莘老又從古靈學第進士
歷官太學博士四年以薦爲太常博士進侍講翊善後以鄒道
鄉浩得罪被貶徽宗卽位歷監察御史中書舍人在朝歲餘每
以遵祖宗法度安靜自然爲言以龍圖閣待制知博州卒

從黃

氏補本錄入

州判陳先生貽範

陳貽範字伯模臨海人治平四年進士嘗遊胡安定之門又師事陳古靈而與羅提刑適爲友歷宗正丞通判處州民懷其德有道不捨遺劔月照處州城之謠所著有慶善集

參台州府志

雲濠謹案先生著有千題適變錄十六卷見宋史藝文志

隱君管臥雲先生師復

管師復者龍泉人也古靈講學仙居先生與其弟師常不告父母奔走而來閉門官舍中惡衣粗食聞古善言善行必欲力行而進之每與人言及其親之老則涕泗沔沔不能收友愛其弟爲人仁勇且直好古而義朋友有彘戾弗革者先生能屈之或至泣下古靈因使爲仙居都講聚諸子使教之諸生畏先生之糾彈莫敢犯矩度者古靈北官先生復從學安定其名曰盛然

無仕進意神宗以大臣之薦召至問曰聞卿工詩所得如何對曰滿鴨白雲耕不破一潭明月釣無痕臣所得也官之不受學者稱爲臥雲先生所著有白雲集

助教管先生師常

管師常者師復弟也履行正固精經術師復學于古靈而歸仙居之弟子失其齋長古靈使先生司之客止莊謹雖退食不脫冠帶橫經夜坐如對古人終歲如一日古靈喜曰生不屑屑于糾彈而修身自律以勸人其更峻也已而從學安定益留心民事適于時用以薦爲太學正古靈管太學嘗薦爲助教其後監江寧府上元縣事古靈又嘗薦之韓忠獻公云先生深于大易春秋之旨惜其書無傳者

陳先生砥

陳砥不知其何所人也古靈仙居學中高弟嘗與管氏兄弟並稱

隱君呂先生逢時

附門人錢景臻

呂逢時字原道仙居人也古靈爲令首執弟子禮仙居人知學者自此始入太學與鄭解友駙馬都尉錢景臻師之欲奏以官固辭不受羅適以孝廉舉不就隱居白巖山終身

縣令黃先生穎

附子公坦

黃穎字仲實莆田人也元祐中以經明行修薦不赴孫莘老爲中丞薦之知長泰縣好講學每晨治公事卽入學與諸生說經抵暮而歸一如古靈之在浦城諸邑也職田所入穀可餘三百

石盡以給耕民兼權龍溪縣其興學如長泰病卒兩縣之民爭致賻子公坦皆謝還之論者以爲再世不媿師門

雲濠謹案先生子公世宣和六年進士官通直郎見福志通志

朝散劉先生淮夫

劉淮夫字長源閩縣人彝之子也先生于古靈爲甥少從學孝于親元豐中爲台州判累被薦更歷一考卽可改官以父被召赴闕不忍離遂不待任滿乞隨侍去父卒監江寧府酒務念母年幾九十思歸陽羨雖甚貧不復顧祿卽乞以朝散郎致仕雲濠案安定學案執中附子長源傳作累官朝散大夫太守以下再三留之皆不可得母卒無屋可居無田可食而守之甚固未嘗一毫有求于人東南薦紳先生皆稱爲孝子先生輒皇恐曰此乃人子之常然無足道

也鄒忠公薦之終不起

公闢門人

教授劉先生康夫

劉康夫字公南閩縣人也彝之從子少從學于周氏熙寧中五路置學官以薦主番禺教嘗進志述二十七篇其文皆羽翼六經之言也元祐中特奏名未唱名卒鄭監門俠志其墓

奉議潘先生鯁

潘鯁字昌言齊安人從周氏學元豐進士授蘄水縣尉遷和州防禦推官知江州瑞昌縣遷吉州軍事推官以奉議郎致仕張耒志其墓曰齊安有君子曰潘昌言其學也正其言也文其居家篤于孝弟其爲吏惠下愛民君子哉著有春秋斷義十二卷

講義十五卷易要義三卷

曾先生伉

曾伉周公闢門人也熙寧二年從三司條例司之請遣先生及程伯淳穎劉執中彝盧仲甫兼謝卿材侯叔獻王汝翼王廣廉八人行諸路相度農田水利稅賦科率徭役利害

參通鑑

傅氏家學

古靈再傳

縣令傅先生希龍

傅希龍者仙遊人也楫之從子官漳浦令以不附二蔡入邪等楫曰不負吾學

管氏門人

隱君林塘與先生石

林石字介夫瑞安人少有志操初習進士聲律既而日古人之學不如是遂刻意諸經聞括蒼管師常明春秋往從受之遭父喪廬墓三年不茹草木之滋臨川王氏三經行先生獨不趨新學以春秋教授鄉里既而春秋爲時所禁乃絕意仕進築室躬耕作萱堂以養母或勸以仕不答講論古今必先實行而後文藝日本之不立末于何有邑官初至率來謁執弟子禮母卒年九十餘白首終喪如父時人以爲難建中靖國年無疾而逝周行己爲沈子正墓銘云河南程正叔京兆呂與叔括蒼龔深之與介夫皆傳古道名世宗師唯是書成弗以示人故世無傳焉

學者稱塘奧先生

雲濠案謝山劄記先生著有塘奧集三游集

梓材謹案管臥雲附弟傳并及門林塘奧傳黃氏原本在安定學系後謝山特立古靈學案且爲二管各立一傳故

于安定卷刪臥雲原傳而移著林氏于是卷

林氏門人

古靈三傳

沈石經先生躬行

別見周許諸儒學案

宋元學案卷五終

士劉諸儒學案表

士建中

趙狩

別見泰山學案

私淑李縉

別見泰山學案

劉顏

子庠

附師高弁
並泰山同調

曹起

附見泰山學案

張洞

別見泰山學案

王開祖

丁昌期

子寬夫

子廉夫

子志夫

吳師仁

弟師禮

楊適

王說

見下鄞江家學

杜醇

王致

從子說

子珩

孫勳

曾孫正己

從子該

子璫

周師厚

子鏐

見上西湖門人

子銖

史簡

子詔

見上西湖門人

豐稷

別見范呂諸儒學案

袁敏

見下西湖門人

汪洙

子思溫

孫大猷

別見龜山學案

姚萼

俞偉

陳摠

子常

樓郁
並安定同調

豐稷

別見范呂諸儒學案

袁轍

子灼

元孫變別
絜齋學案

羅適

別見安定學案

周鐔

史詔

孫浩
別見橫浦學案

元孫鎰
別見耶劉諸儒學案

曾孫

彌忠

曾孫

彌鞏

曾孫

彌林

並見慈湖
學案

舒亶

章望之

黃晞

並古溪同調

侯可

孫仲良 別見劉李諸儒學案

申顏

並開學之先

宇文之邵
蜀學之先

宋元學案卷六

鄞縣全祖望補本

後學慈谿馮雲濠校刊

鄞縣王梓材重校

道州何紹基重刊

士劉諸儒學案

祖望謹案慶曆之際學統四起齊魯則有士建中劉顏來
輔泰山而興浙東則有明州楊杜五子永嘉之儒志經行
二子浙西則有杭之吳存仁皆與安定湖學相應閩中又
有章望之黃晞亦古靈一輩人也關中之申侯二子實開
橫渠之先蜀有宇文止止實開范正獻公之先筆路藍縷
用啟山林皆序錄者所不當遺述士劉諸儒學案

梓材案是卷學

案亦謝山所特立
吳存仁當作師仁

泰山同調

評事士熙道先生建中

士建中字熙道鄆州人也

雲濠案謝山劄記云大名府魏縣人也

孫泰山講學先

生同時而起泰山之所推重者先生爲第一而石徂徠其次也
泰山贈徂徠詩曰攘臂欲爲萬丈戈力與熙道攻浮譎又嘗薦
之范文正公而徂徠高視一切其所服膺自泰山外惟先生其
集中與蔡副樞書薦之尤力先生所著述如道論以言帝王之
道原福以究禍福之本原鬼以明鬼神之理隨時解以著守正
背邪遺近趨遠之說皆醇儒之言也其後以進士授評事宰魏
不知其官爵所止

雲濠案劄記云校書郎

祖望謹案先生嘗以泰山五十未娶謀爲之買田宅以置室其古道可想至于箴規徂徠謂其未抵中道尤切當其弊是眞伊洛以前躬行君子而世無傳者祖望葺學案聊爲之補傳使不至泯泯焉

主簿劉子望先生頽

附師高弁

劉顏字子望彭城人也少孤好古學不專章句師事高侍御弁舉進士第以試祕書省校書郎知龍興縣坐事免久之授徐州文學居鄉里教授數十百人採漢唐奏議爲輔弼名對馮元劉筠錢易蔡齊上其書除任城主簿歲饑發大姓所積粟活數千人李文定迪知兗州青州皆辟爲從事卒著儒術通要經濟樞言復數十篇后徂徠見其書歎曰恨不在弟子之列子庠

參史傳

安定同調

進士王儒志先生開祖

王開祖字景山永嘉人也學者稱爲儒志先生皇祐進士不仕
杜門著書從學常數百人復以薦召試賢良方正未赴而卒先
生見道最早所著有儒志編言復者性之宅无妄者誠之原又
言學者離性而言情奚情之不惡又曰使孔子用于當時則六
經之道反不如今之著又言由孟子以來道學不明今將述堯
舜之道論文武之治杜淫邪之路開皇極之門吾畏天者也豈
得已哉其言如此是時伊洛未出安定泰山徂徠古靈諸公甫
起而先生之言實遙與相應永嘉後來問學之盛蓋始基之惜
其得年僅三十有二未見其止爲可惜也

儒志編

形容不欺芻木幽晦不欺鬼神言而不欺童昏動而不欺愚瞢
疑目于鼻游心于帶是制心者也非治心者也坐則見其存于
室行則見其立于輿是治心者也非養心者也

中夜息于幽室之中吾心之清明者還矣孝弟忠信生乎此時
舜與周公坐以待旦急吾行而不忘也

心動則氣窒心外慮則氣昏耗

情本于性則正離于性則邪

君子之道始于復成于泰極于夬小人之道始于姤成于否極
于剝

君子之德莫不原于誠誠則物之來也如鑑

君子有天下之私小人有一身之公

膠柱不能求五音之和方輪不能致千里之遠拘庸庸之論者無通變之畧持規規之見者無過人之功

燭秉之者莫若隨之者見之明矣奕爲之者不若睹之者之詳也人之智長于人短于己求人之是非易求己之是非難李翱曰凡慮己事則不明斷他人事則必明己私而他人公也

言不行則言隱知不行則知隱

道之充者須時以用之物之穉者須澤以養之須時者養人須澤者養于人此君子小人之分也

丁經行先生昌期

附子寬夫廉夫志夫

丁昌期者永嘉人也學者稱爲經行先生永嘉師道之立始于

儒志先生王氏繼之者爲塘與先生林氏安定古靈之再傳也而先生參之其家世以篤行稱至先生尤明經術嘗築醉經堂以講學三子寬夫鄉貢進士廉夫舉八行志夫進士兄弟好古清修自相師友各以所得質于其父不爲苟同曰此理天下所共不可爲家庭有阿私也尤斥去浮屠之說喪祭無不本古禮云

宮教吳先生師仁

吳師仁字坦求錢塘人陳古靈爲郡守以遺逸薦于朝元祐初召爲太學正遷博士後充吳王宮教授卒先生履行醇正器識高遠嘗肄業太學名聞縉紳應舉不第退居田里甘貧守道每授學者以誠明義理之學而不爲異端之說士習爲之嚮風

梓材謹案謝山學案序錄彙底及刊本並作杭之吳存仁
編閱簡策古靈時杭之鄉先生止有名師仁者存仁之存
當由筆誤

助教楊大隱先生適

楊適字安道慈溪人隱居大隱山爲人醇厚介特議論辯博平
正人有善則稱之不善如未之聞爲學要行乎己惟恐爲人所
知毀譽榮辱不以動其心人莫得而親疏蓋自比仲元叔度之
流鄉人嚴憚之相語不以名氏而尊之曰大隱先生衣食纔自
給非義之餽一介不取躬耕養親族之貧者分賑之鄰盜其稼
人告之先生愀然曰彼窮厄而求其生爾勿治也盜間之慚悔
其後無敢侮者善言治道究歷代治亂之原孫威敏公河自諫

官出案浙東西刑獄欲見先生先生不肯見先生之越時范文
正公守越間之執見焉與致府中澹焉無求公益賢之先生治
經不守章句黜浮屠老子之說歌詩卓越超邁容儀甚偉衣冠
儼如始友錢塘林逋後與同郡王致杜醇結交後進莫不師之
退處四十年德行益高名聞京師仁宗詔求遺逸太守鮑柯以
名聞賜以粟帛太守錢公輔又薦之授將仕郎試太學助教州
遣從事致詔書袍笏輿從迎之先生辭不受遁去年七十有六
遺令篆石壙前曰宋隱人之墓熙寧二年滎陽張岫爲文表之
參四明文獻集

學師杜石臺先生醇

杜醇者越之隱君子也居慈溪學以爲己隱約不求人知孝友

稱于鄉里耕桑釣牧以養其親經明行修學者以爲模楷慶歷中鄆始建學縣令王文公安石請先生爲之師其書曰天之有斯道固將公之我先得之而不推餘于人使同我所有非天意且有所不忍也願先生留聽而賜臨之安石與有問焉先生引孟子柳宗元之說以辭再書強起之曰孟子謂好爲人師者謂無諸中而爲有之者豈先生謂哉彼宗元惡知道韓退之毋爲師其孰能爲師天下士將惡乎師哉先生始就焉慈溪令林肇立學又起先生爲師亦固辭王文公作師說以勉之二邑文風之盛自先生始先生談詩書不倦爲詩質而清當時謂學行宜爲人師者也

同上

謝山慶曆五先生書院記曰夷攷五先生皆隱約草廬不

求聞達而一時牧守來浙者如范文正公孫威敏公皆摳
衣請見惟恐失之最親近者則王文公乃若陳賈二相非
能推賢下士者也而亦知以五先生爲重文公新法之行
大隱石臺鄞江已逝西湖桃源尙存而不肯一出以就功
名之會年望彌高陶成倍廣數十年以後吾鄉遂稱鄞魯
耶樊繻褐化爲紳纓其功爲何如哉

處士王鄞江先生致

王致字君一鄞縣人與同郡楊杜二先生爲友俱以道義化鄉
里諸生子弟師尊之稱三人皆爲先生嘗與牧守言政事王文
公安石復書曰無事于職而愛民之心乃至于此可以爲仁矣
年七十樂道安貧妻收遺棄子拾墮樵浩然無悶鄉人莫不高

其行

參四明文獻集

謝山辯鄞江墓誌曰鄞江先生極爲荆公所重其墓誌係荆公作然不載于集中惟舊志引其語曰四明立言之士自先生始而已至聞蘂泉作鄞縣志始盡錄其全文子疑其冗蔓不類荆公文體及觀其所記門下弟子自豐稷袁轂周師厚諸人外又稱遊學者有張機張邵張郊張祁攷郊祁皆邵之弟邵係徽宗宣和三年進士建炎初假禮部使金補其弟祁爲明州觀察推官遂家焉邵于紹興十三年歸自金二十五年卒于廣德而鄞江先生卒于至和二年邵兄弟能遊學其門最少亦不下弱冠而自至和以及宣和凡六十七年始登第又八年始使金留十四年乃歸

又十二年始卒抑何其長年也以豐尚書之輩行相去幾三世而謂其同門不亦謬乎或曰桃源先生爲鄞江之猶子邵兄弟或嘗經受業而誤以爲鄞江此于時代尙不甚遠然卽如此說而誌文之出于依託可知也

梓材謹案鄞江墓誌云上間其德行召拜校書郎命至則先生不起謝山以此誌爲依託荆公之作惟荆公文集弔先生詩作悼王處士故第以處士標之

正議樓西湖先生郁

樓郁字子文自奉化徙鄞卜居城南志操高厲學以窮理爲先爲鄉人所尊處窮約屢空自樂慶厯中詔郡縣立學延致鄉里有文學行義者爲之師先生掌教縣庠者數年又教授郡學前後三十餘年學行篤美信于士友一時英俊皆在席下門人之

知名者清敏豐公稷光祿袁公轍天台羅公道也登進士第調廬江主簿自以祿不及親絕仕進意以大理評事終于家有遺集三十卷贈正議大夫子孫皆踵世科五世孫鑰德行文章爲時名臣仕至參知政事

參四明文獻集

謝山五先生書院記曰五先生之著述不傳于今故其微言亦闕雖然排奸詆布譴論廩廩豐清敏之勁節也急流勇退菜月蘋風周銀青之孤標也再世蘭芽咳南弗替史翼公父子之純孝也嬰兒樂育以姓爲字陳將樂俞順昌之深仁也殺虎之威同于驅鱷姚夔州之異政也于公治獄民自不冤袁光祿之神明也一編麟經以紹絕學汪正奉之豐滄也金橘不知蕭然詩葉望春先生之清貧也卽

以有負門牆如舒信道者其人不足稱而文辭終屬甬上名筆則五先生之淵源可知矣

古靈同調

光祿章表民先生望之

章望之字表民浦城人少孤喜問學志氣宏放爲文辭博長于議論初由伯父郇公蔭爲祕書省校書郎監杭州茶庫逾年辭疾去舉賢良方正郇公在相位以嫌掇之乃上書論時政凡萬餘言不報丁母憂毀瘠過制服除浮游江淮閒犯艱苦汲汲以營衣食不自悔人勸之仕不應也其兄拱之知晉江縣忤其郡守守怒誣以贓貶先生號泣力訴于朝時守方貴顯事久不得直先生訴不已章十餘上起獄數年朝廷爲再劾卒脫兄冤復

官如初先生遂不復仕覃恩遷太常太祝大理評事翰林學士
歐陽修韓絳知制誥吳奎劉敞范鎮同薦其才宰相欲稍用之
除僉書建康軍節度判官不赴又除知烏程縣趣令受命固辭
遂以光祿寺丞致仕卒先生喜議論宗孟子言性善排荀卿楊
雄韓愈李翱之說著救性七篇歐陽修論魏梁爲正統先生以
爲非著明統三篇江南李盱江著禮論謂仁義智信樂刑政皆
出于禮先生訂其說著禮論一篇其議論多有過人者嘗北游
齊趙南汎湖湘西至汧隴東極吳會山水勝處無所不歷有歌
詩雜文數百篇集爲三十卷

助教黃聳隅先生晞

黃晞字景微建安人少通經聚書數千卷學者多從之遊自號

贅隅子著欵歐瑣微論十卷以爲贅隅者拊物之名欵歐者歎聲瑣微者逆辭也石徂徠在太學遣諸生以禮聘召先生走匿鄰家不出樞密使韓魏公琦表薦之以爲太學助教致仕受命一夕卒

關學之先

殿丞侯華陰先生可

申先生顏

合傳

侯可字無可其先太原人徙華陰少倜儻不羈以氣節自喜既壯盡易前好篤志爲學祁寒酷暑未嘗廢業博物強記于禮之制度樂之形聲詩之比興易之象數天文地理陰陽氣運醫算之學無所不究自陝而西多宗其學先生亦以樂育爲己任主

華學之教者幾二十年再試不遇遂棄其業孫威敏公征儂智高請先生參其軍事奏凱敘功知巴州化成縣巴俗尙巫而輕醫先生誨以義理巴人化之娶婦多資財于女氏至有老弗能嫁者先生爲定昏禮又爲減官輸絲帛之賦調耀州華原簿痛抑富民之兼并者誅姦胥以大理評事簽書儀州判官韓忠獻公鎮長安與先生謀涓源之地至其境以朝廷恩德諭其酋豪翌日詣軍門輸土不費一矢因城熟羊以撫之嘗以數十騎行邊猝與敵遇乃分其騎爲四令高其旗幟旋山徐行敵以爲有大兵而誘之也避去以忠獻薦遷殿中丞知涇陽縣議復鄭白水利得請而讒者搆之罷官去不竟其施以元豐己未卒有申顏先生者君子也非法不言非禮不履關中之人無老幼見之

坐者必起與先生爲莫逆顧皆貧先生之未仕也嘗與易衣互出謀食以養兩家有無均之申顏先生嘗曰吾不可一日失侯無可或問之曰無可能攻吾之過耳申顏先生病先生徒步千里爲之求醫未至而死其目不瞑或曰是待候先生而瞑乎未歛先生馳至撫之而瞑申顏先生嘗欲葬其先世而未能及死無子先生傾所有不足賣衣以益之卒成其志天寒先生父子尙單衣忽有饋白金者謂其子曰申顏先生之妹將嫁速以資之其好義如此其卒也戒其子勿用浮屠先生之女兄適程氏明道伊川二先生之母也故明道志先生之墓先生之孫是爲荆門先生仲良

祖望謹案呂舍人本中曰闕學未興申顏先生蓋亦安定

泰山之僂未幾而張氏兄弟大之然則申顏先生之有功
關中亦已多矣而先生爲之死生之友觀其所學非腐儒
之無用者而宋史僅著之義士傳中子故特表而出之

蜀學之先

中允宇文止止先生之邵

宇文之邵字公南綿竹人舉進士爲文州曲水令神宗卽位求
言疏言公卿大夫民之表宜先以節義廉恥風導之凡所建置
必與大臣共議以廣其善號令威福則專制之疏奏不報喟然
曰吾不可仕矣遂致仕以太子中允歸時年未四十自強于學
不易其志日與交友爲經史琴酒之樂退居十五年而卒司馬
溫公曰吾聞志不行顧祿位如錙銖道不同視富貴如土芥今

子之邵見之矣范蜀公亦曰之邵位下而言高學富而行篤少
我二十一歲而先我掛冠使吾慊然其爲兩賢所推尙如此

史傳

士氏門人

趙先生狩

別見泰山學案

士氏私淑

縣尉李先生縉

別見泰山學案

劉氏家學

知州劉先生庠

劉庠字希道子望之子也八歲能詩蔡齊妻以子第進士爲高
密廣平院教授英宗求直言先生上書論時事除監察御史裏

行神宗立遷殿中侍御史爲右司諫言中國禦戎之策守信爲上除集賢殿修撰河東轉運使進天章閣待制河北都轉運使移知眞定又爲河東都轉運召知開封先生不肯屈事王荆公荆公欲見之戒典謁者曰今日客至勿納惟劉尹來卽告我或語先生盍往見之先生曰見之何所言自彼執政未嘗一事合人情脫問青苗免役將何辭以對竟不往奏論新法又與蔡確爭延參禮遂以龍圖閣直學士歷知滑州卒年六十四

參史傳

劉氏門人

縣令曹先生起

附見泰山學案

進士張先生洞

別見泰山學案

吳氏家學

直閣吳先生師禮

吳師禮字安仲錢塘人師仁弟太學上舍賜第歷官右司員外郎工翰墨徽宗嘗訪以字學對曰陛下御極之初當志其大者臣不敢以末伎對終直祕閣知宿州遊太學時其兄爲正守春秋學他學官有惡之者條其疑問諸生先生悉以兄說對學官怒鳴鼓坐堂上眾質之先生引據三傳意氣自如江公望時在旁心竊喜後遂定交

參史傳

楊氏門人

銀青王桃源先生說

見下鄞江家學

鄞江家學

銀青王桃源先生說

附子珩

王說字應求鄞縣人鄞江先生之從子也受學鄞江與弟該皆著名教授鄉里三十餘年熙寧中以特恩補州長史無田以食無麻桑以衣怡然自得子孫世其學子珩字彥楚大觀三年進士官宗正少卿

參四明文獻集

雲濠謹案宋景濂守齋類藁序云昔在宋時桃源王應求亦鄞人同季父致招樓榭楊適杜醉諸公因就妙音院立孔子像講貫經史倡爲有用之學學者宗之應求所著唯在立言他則未暇及故有五經發源五十卷奏議書疏詩文二百一十一篇薦者列其事召爲明州長史應求辭及其既沒敕建桃源書院贈銀青光祿大夫賜紫金魚袋梓材謹案謝山宋神宗桃源書院御筆記云五先生之倡道其三皆以布衣終身卽仕者亦不達而先生獨邀宸奎之賜固異數也又案王一辰而上三補耆舊詩于先生傳云師仲父鄞江先生及楊先生適友杜先生醉樓先生郁是先生又爲大隱門人

縣令王望春先生該

附子墓

王該字蘊之桃源先生之弟學者稱爲望春先生登慶曆六年進士王荆公宰鄞時與之友善以詩章相唱酬與兄齊聲令鄞城官舍旁有嘉木葉長可尺許每得一詩取葉書之旣卒歸橐蕭然惟脫葉甚富子璿字元圭元豐進士喜藏書以文稱

參費

慶四明志

提舉王先生勳

附子正己

王勳字上達桃源先生之孫也政和八年進士提舉廣南市舶一錢之利皆歸有司家人不識舶貨之名及卒賈胡率錢二百萬緡爲賻子正己卻之曰吾父以廉直聞雖貧猶能負喪以歸不愧廉叔度也清白之傳實桃源家訓正己終太府卿

參四野

文獻集

鄞江門人

運判周先生師厚

周師厚字敦夫鄞縣人從王鄞江遊皇祐五年進士仕至朝散郎荆湖南路轉運判官時役法方行先生言四方風俗不同復有勞逸輕重不宜槩賦朝議是之章惇聞溪峒蠻擾辰沅二州議輸常平粟以備邊先生持不可曰溪獠靜擾無常常平歲入有程當使邊卒廣屯田爲便從其議

參延祐四明志

冀公史先生簡

史簡鄞縣人以後人貴封冀公爲鄞江高弟事母最孝最閒越公之先或謂其作吏用杖者謬越公爲西湖高弟再世與豐清

敏同門

參鮎埼亭外編自注

清敏豐相之先生稷

別見范呂諸儒學案

朝奉袁公濟先生轍

見下西湖門人

正奉汪先生洙

附子思溫

汪洙字德溫鄆縣人父元吉爲縣從事爲范文正公所知王荆公宰鄆以廉平吏薦于轉運使孫威敏沔先生以春秋教授于鄉鄉人稱之爲汪先生子思溫以上舍爲雄州教授調餘姚令築堤浚湖民信愛之欽宗以諸王就傅擇除贊讀

參鄆縣志

梓材謹案謝山五先生書院記自注云汪正奉春秋實與孫明復齊名容齋稱其豐論不施而近志妄謂其官閣學

知州姚先生萼

姚萼字舜徒以字行慈溪人幼開爽穎悟學如夙植熙寧九年進士爲桃源宰訊民疾苦而振雪之郡將怙威凌僚吏屬邑患

苦先生毅然爭論郡將爲之少戢鄰郡有訴不平必丐于部使者願付先生決之捐貲修孔子廟督課諸士翕然向方鄉有虎先生以文禱諸社越三日虎仆祠旁奏績爲天下第一除提舉成都府路常平等事陞辭神宗諭以卿任桃源有愛民之心先生退謁丞相論蜀道利疚乞以義倉之儲置吏立法收養鰥寡老幼死給衣裳官爲殮葬薦饑聞有遺兒請顧媪乳之丞相爲奏行焉丁艱未赴服除改湖南神宗復諭以居養安濟漏澤爲朕施實德于民卿向有言故復命卿後由江東副曹除直龍圖閣知夔州興學勸農有古循吏風卒之日夔民罷市聚哭訃聞桃源民乃卽先生祠爭出貲薦奠焉

參寧波府志

縣令俞先生偉

俞偉字仲寬鄞縣人元祐初宰南劍之順昌閩人生子多者皆不舉建劍尤甚先生作戒殺子文召父老列坐廡下以俸置醪醴親酌使歸勸鄉人活者以千計生子多以俞爲字朝廷爲立法行一路先生被差他郡還邑有小兒數百迎于郊部使者問于朝降詔獎諭進秩再任且去出粟以賑其羸臥而病者

參延

麻四明志

縣令陳先生摠

陳摠字君益鄞縣人紹聖閒宰南劍之將樂敦崇學校獎進士類政尙愷悌先是邑民家舉一子富室不過二子餘悉棄之先生至諭以天性申以令甲犯者窮治自茲民無不舉子男陳其名女陳其氏後卒于官邑人思慕祠而祀之遇旱禱雨輒應鄰

境淫雨亢陽乞靈祠下咸遂所祈部使者以其有功于民乃請
于朝錫廟額曰旌福

參寶慶四明志

西湖家學

知軍樓先生常

樓常正議子治平進士知興化軍

參鄞縣志

西湖門人

清敏豐相之先生稷

別見范呂諸儒學案

朝奉袁公濟先生穀

附子灼

袁穀字容直一字公濟鄞縣人嘗一試于開封兩試于鄉皆第
一嘉祐六年登第博貫羣書擅名詞藻歷知邵武軍通判杭州
其爲開封舉首也蘇文忠實爲之亞及資郡而文忠爲守相得

益驩唱酬篇什甚富移知處州終朝奉大夫子灼字子烈元祐
進士爲光祿丞軍器少監出知婺州有武臣曹宗者時相蔡京
媚黨爲害鄉曲子烈械之獄死焉坐是貶秩起知隨州宣和末
召爲倉部郎面對力勸帝清心省事安不忘危言甚切直黜知
泗州終朝議大夫

參寶慶四明志

提刑羅赤城先生適

別見安定學案

銀青周鄞江先生錫

周錫字廉彥鄞縣人師厚子元豐二年進士初仕爲桐城尉慨
然曰學優則仕吾昔所治科舉耳遂益究治六籍諸子百氏之
說悉著論其本旨嘗官桐城辭不赴乃遊潁昌訪其舅范忠宣
純仁過洛見文潞公司馬溫公咸器重之在京師上書言徐禧

永樂之失國子祭酒豐相之給事中范淳夫交薦之後知南雄
以言邊事忤時相入黨籍卽退休于家

參毛前四明志

謝山書鄉先生宋中大夫家傳後曰大夫預名元祐黨人
之一大夫之舅氏范丞相忠宣公純仁右丞純禮待制純
粹及大夫初娶婦翁胡右丞宗愈再娶婦翁王學士覲中
表兄弟范開封正平九族之中登錮籍者七人又讀陳忠
肅公權典兄書云章氏議卻不成農師極惓惓亦不敢就
自到官尤覺中饋不可無人瑞奴等零丁益可憐不免議
同年周戶曹之妹其家清貧其人年長貧則不驕長則諳
事舉家好善故就之戶曹卽大夫也嗟乎卽忠肅之書可
以見大夫一門之賢而其得力于范文正公胡文恭公之

典型者亦豈少哉文正堦爲賈東明蕃以不附新法忤荆公而忠宣之出司馬侍郎忠潔公朴溫公羣從握節死于金者也大夫胡氏之私則僚堦鄧考功忠臣亦在黨禁可謂同岑之盛矣

越公史八行先生詔

史詔字升之鄞縣人父冀公簡母葉氏夫人遺腹子也順秀豐下少有立志嘗與豐清敏舒中承受業于鄉先生樓郁以孝行間遇大比輒引避嘗曰無母氏之節已無史氏矣誓終身母子不相離或曰辟薦所以榮母也先生曰朝廷設科思得其用敢竊爲己榮邪設與計偕則初志爽矣況亡親欺君士君子所不爲也大觀二年詔舉八行鄉人以先生應命遂與母避于縣東

大田山郡守迹所往迫使就道誓不起鄉人稱爲八行先生

寧波府志

中丞舒嬾堂亶

舒亶字信道鄞縣人號嬾堂官至中丞爲樓正議高弟本屬正學特以附麗荆公遂爲呂蔡一流力與東坡爲難良可惜也

周氏家學

鄞江再傳

銀青周鄞江先生鰲

見上西湖門人

進士周先生銖

周銖師厚次子鄞江鰲之弟崇寧二年進士兄弟偕隱鄉人慕之

參延祐四明志

史氏家學

越公史八行先生詔

見上西湖門人

侯氏家學

侯荆門先生仲良

別見劉李諸儒學案

汪氏家學

鄆江三傳

莊靖汪適齋先生大猷

別見龜山學案

八行家學

忠定史真隱先生浩

別見橫浦學案

文靖史自齋先生彌忠

華文史獨善先生彌鞏

史和旨先生彌林

並見慈湖學案

西湖續傳

宣獻樓攻媿先生論

別見耶劉清儒學案

袁氏續傳

正獻袁絜齋先生變

別爲絜齋學案

宋元學案卷六終